



Stanje muslimana kroz godišnja doba i poziv za pomoć unesrećenima (Meka)

Hatib: dr. Abdurrahman ibn Abdulaziz es-Sudejs

3. šaban 1444. po Hidžri / 24. februar 2023.

Hvala Allahu, Onome Koji je uredio vrijeme i svemu odredio rok, Stvoritelju kosmosa bez premca. Svjedočim da nema boga osim Allaha, jedinog, Koji nema druga, svjedočenjem koje našim životima daje blagoslov i prosvjetljenje, i svjedočim da je naš vjerovjesnik, prvak i uzor Muhammed, Allahov rob i poslanik, koji nas je podsticao na korištenje vremena, požurivanje sa činjenjem dobrih djela i natjecanje u tome, neka su na njega Allahova milost i blagoslov, i na njegovu čistu porodicu i plemenite ashabe, i tabiine i sve one koji ih slijede u dobročinstvu, žudeći za Džennetom.

O vjernici, bojte se Allaha onako kako Ga se treba bojati, bogobojaznost je ponos i hvale vrijedno djelo, i njome se postiže Allahovo zadovoljstvo. "O vjernici, bojte se Allaha onako kako Ga se treba bojati, i umirite samo kao muslimani." (Ali Imran, 102)

Poštovani vjernici! Allah, džellešanuhu, učinio je smjenu godišnjih doba dokazom Svoje veličanstvene moći, duboke mudrosti i podsjetnikom Svojih robova na Vječnu kuću. Uzvišeni kaže: "U stvaranju nebesa i Zemlje i u izmjeni noći i dana su, zaista, znamenja za razumom obdarene." (Ali Imran, 190)

Poslanik, sallallahu alejhi ve sellem, rekao je: "Teško onome ko pročita ovaj ajet, a ne razmisli o njemu." (Ibn Hibban) Naši dobri prethodnici dugo su i temeljito razmišljali o ovim fascinantnim dokazima, pa su, u spoznajnom smislu, postigli ono što nisu postigli drugi. Vođa pravovjernih Alija ibn Ebu Talib, radijallahu anhu, rekao je: "Vječnim džennetima pohrlili su ljudi koji nisu pretekli druge u namazu i postu, nego su uzeli pouku iz Allahovog govora, njihova srca su se uplašila, a njihovo tijelo





skrušilo." Ibn Kajjim je rekao: "Da postoji samo jedno godišnje doba, u njemu bi se izgubile sve koristi drugih godišnjih doba."

O vjernici! Ashabi Allahovog Vjerovjesnika, sallallahu alejhi ve sellem, radovali su se hladnim danima, u njima su mogli osjetiti užitak pokornosti Allahu i slast ibadeta. Ibn Mesud, radijallahu anhu, govorio je: "Dobro došla, zimo, u kojoj se spušta blagoslov, čije su noći duge za noćno bdijenje – kijam i čiji su dani kratki za post." Muaz ibn Džebel, radijallahu anhu, zaplakao je na smrtni i rekao: "Plačem za žeđi u vrelin danima, ibadetom u zimskim noćima i druženjem sa učenjacima." U jednoj predaji kaže se: "Zima je proljeće vjernika, njeni dani su kratki, pa ih on posti, a njene noći su duge, pa klanja u njima." Ibn Dževzi, Allah mu se smilovao, rekao je: "Svaki čovjek trebao bi cijeniti svoje vrijeme i znati njegovu vrijednost, i ne potrošiti nijedan njegov trenutak izvan pokornosti Allahu."

Poslanik, sallallahu alejhi ve sellem, svojom uputom, dao je najbolji primjer. Mikdam ibn Šurejh prenosi od svoga oca da je rekao: "Upitao sam Aišu o Poslanikovom izlasku u prirodu (pustinju), pa je rekla: 'Allahov Poslanik, sallallahu alejhi ve sellem, izlazio je do onih tilāa.'" (Ebu Davud sa vjerodostojnim lancem) Tilā su riječni izvori, padine i uzvišenja. Poslanik, sallallahu alejhi ve sellem, odmarao je svoju dušu odlaskom na ova mjesta i uživanjem u očaravajućim ljepotama zime, predivnim prizorima proljeća, ozelenjeloj zemlji, baštama cvijeća i radosnim licima.

O muslimani, u hladnim periodima godine posebno dolazi do izražaja lakoća i fleksibilnost islamskih propisa, kao što je propis potiranja po mestvama i spajanja namaza u slučaju jakih padavina i vjetrova. Također, u ovim periodima musliman se sjeća svoje siromašne braće, izbjeglica i unesrećenika koji nemaju kuću u koju bi se sklonili od hladnoće i vrućine, čija je postelja zemlja, a nebo pokrivač, nastoji im osigurati ogrjev i krov nad glavom i neprestano misli o njihovim potrebama.

U zimskom periodu musliman brine o svom i zdravlju svoje braće, poduzima sve potrebne mjere na koje nas upućuje naša čista vjera, i sve dostupne uzroke koji imaju preventivni karakter, kao što je vakcinisanje protiv sezonskih gripa, a posebno za one koji prisustvuju javnim skupovima i manifestacijama.





U proljetnim danima neki naši dobri prethodnici – selefi odlazili su u polja, zastajali su, posmatrali, razmišljali i tražili od Allaha Džennet. U proljeće su vidljivi tragovi kiša, drveće se ukrašava zelenilom, a zemlja bujanjem. Proljeće šije odjeću od cvijeća i izlijeva nakit od svjetlosti. Ibn Kajjim, Allah mu se smilovao, rekao je: “Najzdravije godišnje doba je proljeće, u njemu se smanjuju bolesti i ozdravljaju tijela i duše.” To je podsticaj muslimanu da što više zahvaljuje Allahu na blagodatima, i pojača svoje napore na putu ka Džennetu kroz činjenje dobrih djela. Proljeće je mladost vremena i vjesnik ruža i bosiljaka. Uzvišeni kaže: “Zato pogledaj tragove Allahove milosti – kako On oživi zemlju nakon mrtvila njezina! On će, uistinu, i mrtve oživiti, On sve može.” (Er-Rum, 50) U ovom kontekstu bitno je podsjetiti se na važnost čuvanja životne okoline i biljnog pokrivača, i saradnje sa nadležnim institucijama u očuvanju zelenih površina i njihove čistoće, i širenju ekološke svijesti i kulture.

Allah je najveći, nema boga osim Allaha, slavljen neka je Allah!

O vjernici, “to je Allahovo djelo Koji je sve savršeno stvorio” (En-Neml, 88), “i kad je On na robove Svoje na koje želi prolije, oni se odjednom radošću ispune, iako su bili očajni prije nego što se spustila na njih” (Er-Rum, 48–49).

Poštovani vjernici, natkrilio nas je mjesec šaban, mjesec raznovrsnog dobra, mjesec prema kojem je većina ljudi nemarna. Poslanik, sallallahu alejhi ve sellem, u njemu je povećavao ibadet i post. Usama ibn Zejd, radijallahu anhu, kazuje: “Rekao sam: ‘Allahov Poslaniče, vidio sam da u šabanu postiš više nego u drugim mjesecima, izuzev ramazana?’, a Poslanik, sallallahu alejhi ve sellem, rekao je: ‘To je mjesec prema kojem su ljudi nemarni, između redžeba i ramazana, mjesec u kojem se djela uzdižu Gospodaru svjetova, i zato želim da se moja djela uzdignu dok postim.’” (Ahmed i Nesai) Ovim hadisom želi se ukazati na važnost činjenja dobrih djela u “vremenima nemarnosti”, i da je to nešto što Allah voli i čime je zadovoljan. Podsjećamo one koji nisu napostili propuštene dane ramazana da to učine u ovom mjesecu, prije nastupanja ramazana, a to je i jedan vid duhovnog imanskog pripremanja za doček mjeseca ramazana.





Ummete islama, s protokom dana i noći, mjeseci i godišnjih doba, ubrzano se smjenjuju događaji koji pogađaju naš islamski ummet, gotovo ih je teško sve registrovati, i svi su oni mali u poređenju sa jednim, koji se, iz godine u godinu, ponavlja, a to je bjesomučna i sistemska kampanja protiv Božije knjige Kur'ana. Mi sa ovog svetog mjesta, i u ovom blagoslovljenom vremenu, opetovano i kategorično odbacujemo svaki vid nasrtaja na muslimanske svetinje i vrijeđanje šerijata, i jasno poručujemo da je ovo bezobzirno ponašanje i namjerni nasrtaj na časni Kur'an zločin i povređivanje osjećaja više od milijardu i po muslimana u svim dijelovima svijeta, i da je to ogavni terorizam koji će samo povećati privrženost muslimana Knjizi njihovog Gospodara, kroz njeno učenje napamet, riječi i djela. Uzvišeni kaže: "Mi, uistinu, Kur'an objavljujemo i zaista ćemo Mi nad njim bdjeti!" (El-Hidžr, 9) Nameće se potreba za uvođenjem posebnih zakonskih regulativa kojima bi se inkriminiralo takvo maloumno ponašanje, koje u konačnici ne donosi ništa dobro, osim što vodi širenju isključivosti, mržnje i ekstremizma među ljudima, i predstavlja prijetnju međunarodnim odnosima i miru. Također, osuđujemo i odbacujemo konstantne nasrtaje okupatorskih snaga na muslimanske svetinje unutar kompleksa Mesdžidul-Aksa, nasilje nad njegovim stanovnicima, a kod Allaha je pomoć. Molim Ga da popravi stanje muslimana na svakom mjestu, On je najbolja uzdanica i najplemenitiji u uslišavanju molbi.

Poštovani vjernici, podsjećamo sve nas na obavezu solidarnosti sa bratskim narodima koji su pogođeni zemljotresom i na razorne štete koje je on uzrokovao. Molimo Allaha da se smiluje i oprostí umrlima, a da zaliječi rane povrijeđenima, što prije. Allah im nadomjestio gubitke, podario im utjehu, oprostio njihovim umrlim i izliječio njihove ranjenike i bolesne, amin!

Donosite salavate, Allah vam se smilovao, na onoga kojem je uzdignut spomen među svjetovima, najboljeg čovjeka, kao što vam je naredio vaš Gospodar, Silni, Hvaljeni, u Svojoj časnoj Knjizi, rekavši: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56) Molim Allaha da i meni i vama podari blagoslov u časnom Kur'anu, i da podari da nam koriste njegovi





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

ajeti i mudra opomena. Rekoh ovo i od Uzvišenog Allaha tražim oprost za sebe, za
vas i sve muslimane od svakog grijeha, a tražite i vi, On mnogo prašta i On je milostiv.

